



Акафист

святому преподобному

Герману Соловецкому

Кондак 1

Избранный чудотворче и изрядный угодниче Христов, отче наш Германе преблаженне, пустынного жития на острове Соловецкестем первоначальниче. Восхваляем тя любовью, ты же, яко имеяй дерзновение ко Господу, от всяких нас бед и скорбей свободдай, да зовем ти:

Радуйся, отче наш Германе, преподобных Зосимы и Савватия сподвижниче.

Икос 1

Ангельски пожив, яко ангел безплотен на земли явился еси, преподобне отче наш Германе; ты бо евангельскаго гласа послушав, от юности иго Христово на рамо свое взем, в пустыню потекл еси, и, упование все на Бога возложив, Тому ревностно служити возжелал еси. Сего ради восхваляем тя сице:

Радуйся, родителей твоих плоде
благословенный;

Радуйся, Господа твоего благий рабе и
верный.

Радуйся, яко Христа единого возлюбил еси;

Радуйся, яко многая лета на острове
пустыннем Богу служил еси.

Радуйся, иго Христово на себе вземый;

Радуйся, от Подвигоположника Христа дар
исцелений приемый.

Радуйся, яко красная мира сего ни во чтоже
вменил еси;

Радуйся, в брennem телеси, яко безплотен,
пожил еси.

Радуйся, в страсе Божии издетска
воспитанный;

Радуйся, на подвиги иночества от Господа
призванный.

Радуйся, места рождения твоего града
Тотьмы похвало и утверждение;

Радуйся, обители Соловецкия славо и
ограждение.

Радуйся, отче наш Германе, преподобных
Зосимы и Савватия сподвижнице.

Кондак 2

Видя, яко надлежит человеку прилежно злая
от юности его терпети, усердно потщался еси
совлещися ветхаго человека, тлеющаго в похотех
его, и облещися в новаго, по Богу созданнаго в
преподобии и правде; темже слезами покаяния
день и ночь душевную ниву твою орошал еси,
терния грехов и страстей искореняя, Христу же
поя: Аллилуиа.

Икос 2

Разум просвещен свыше имея, провидел еси,
отче Германе, будущая яко настоящая, и егда
преподобный Зосима узре свет, осиявый место,
на немже живяше, и церковь велию на воздусе,
на востоце явльшуюся, тогда пророчески рекл
еси ему, глаголя: «Не ужасайся и внимай себе;
яко Господь чрез тя монахов множество соберет
зде». Мы же проречения твоего исполнение
видяще и сему дивящися, тако глаголем ти:

Радуйся, душетленных сластей мира сего не
познавый;

Радуйся, премудрости небесныя взыскавый.

Радуйся, яко добре на земли подвизался еси;
Радуйся, яко козней демонских не убоялся еси.

Радуйся, некнижным путь верный к небесем показавый;

Радуйся, в молитве и трудех непрестанно пребывавый.

Радуйся, яко нерадивых молитвою твоею к покаянию воздвизаеши;

Радуйся, яко изнемогающих и унывающих силою благодати укрепляеши.

Радуйся, вольную Христа ради нищету возлюбивый;

Радуйся, в нестяжании безпечальное житие проводивый.

Радуйся, яко лучами добродетелей твоих иноков просвещаеши;

Радуйся, яко от всякия напасти их ограждаеши.

Радуйся, отче наш Германе, преподобных Зосимы и Савватия сподвижниче.

Кондак 3

Сила Вышняго укрепи тя, егда, приступая работати Господеви, по слову Писания, душу твою во искушение уготовал еси, постом, бдением и многими лишениями в пустыни тело твое изнуряя, душу же молитвою непрестанною питая, во псалмах и пениих и песнях духовных воспевая сердцем и усты Богу: Аллилуиа.

Икос 3

Имея ревность о спасении души своея, дом отчий и вся красная мира сего оставил еси, угодниче Христов, и мужественно в пустыню вселился еси, сподвижник и сотаинник преподобным Савватию и Зосиме был еси; темже и на небеси купно с ними мзду трудов своих обрел еси, идеже слышиши от нас похвалы сия:

Радуйся, преподобных Савватия и Зосимы сожителю;

Радуйся, преподобных совершенного безмолвия любителю.

Радуйся, яко тесный путь паче широкаго избрал еси;

Радуйся, яко непрестанною молитвою дары духовныя стяжал еси.

Радуйся, святым древним отцем ревновавый;

Радуйся, всего себе на служение Богу предавый.

Радуйся, яко демонския полки всеконечно погубил еси;

Радуйся, яко ангельския лики возвеселил еси.

Радуйся, плоти угодия никогдаже творивый;

Радуйся, притекающим к тебе отец чадолюбивый.

Радуйся, яко во плоти сый риз греховных до конца совлеклся еси;

Радуйся, яко образ Божий в себе благодатию Христовою возставил еси.

Радуйся, отче наш Германе, преподобных Зосимы и Савватия сподвижнице.

Кондак 4

Бурю уныния и напастей, от врага спасения подвижником благочестия наводимую, молитвою отгоняя и в непрестанных трудах пребывая, помощию Божию достигл еси тихаго

пристанища, покоя душевнаго, благодарне
Благодетелю Богу взывая: Аллилуиа.

Икос 4

Слышавше ревнителие равноангельнаго
жития, яко на острове Соловецкестем
преподобнии отцы Зосима и Герман обитель
боголепнаго Спасова Преображения устрояют и
ищущих спасения братолюбно приемлют,
Божииим Духом движимии притекаху, просяще
наставления и руководства. Мы же, суетою
омраченнии, тебе, яко общаго наставника, отче
наш Германе, прославляем звании сими:

Радуйся, плоть твою духови покоривый;

Радуйся, трудом, бдением и постом ю
изнуривый.

Радуйся, яко слез твоих струями ниву
душевную напоил еси;

Радуйся, яко вся помыслы душепагубныя от
себе удалил еси.

Радуйся, стрелою любви Божественныя
сердце твое уязвивый;

Радуйся, немощи немощных, яко сильный, на
себе носивый.

Радуйся, яко причастник всем боящимся
Бога был еси;

Радуйся, яко до зела себе смирил еси.

Радуйся, очи наша верою просвещаяй;

Радуйся, сердца наша надеждою спасения
озаряй.

Радуйся, яко преподобному Зосиме в
созидании обители послужил еси;

Радуйся, яко подвиги твоими братию всю
удивил еси.

Радуйся, отче наш Германе, преподобных
Зосимы и Савватия сподвижнице.

Кондак 5

Боготечная звезда явился еси, богоблаженне
отче наш, преподобным Савватию и Зосиме,
егда восхвалял еси пустынность острова
Соловецкаго и провождал еси их, по морю
пльвя, на место святое сие, идеже в безмолвии
труды ко трудом прилагая, плоды духовныя
собирал еси, Богу же сердцем чистым взывал
еси: Аллилуиа.

Икос 5

Видя враг рода человека, яко необитаемая доселе пустыня процветает, яко крин, и яко в ней имя Господне от пустынножителей прославляется, восхоте погубити святое дело Божие; напусти бо человека некоего с женою его и чады преселитися на остров. Ангели же Господни, биения давшие жене, повелеша оставити остров, да будет сей в жилище токмо иноков. Сего ради прославляюще Господа, тако благоизволившаго, глаголем ти:

Радуйся, измлада иноческое житие избравый;

Радуйся, пустынного и безмолвного пребывания взыскавый.

Радуйся, яко непрестанно себе внимал еси;

Радуйся, яко равноангельное житие показал еси.

Радуйся, в терпении мнозе потрудивыйся;

Радуйся, молитв забралом присно ограждавыйся.

Радуйся, яко преподобным Зосиме и Саватию сподвижник и сотаинник был еси;

Радуйся, яко с ними в пристанище
безстрастия достигл еси.

Радуйся, яко злато в горниле, искушенный;

Радуйся, светом Трисианным озаренный.

Радуйся, яко с небесе на вся ны милостивно
призираеши;

Радуйся, яко вся прошения наша во благо
исполняеши.

Радуйся, отче наш Германе, преподобных
Зосимы и Савватия сподвижнице.

Кондак 6

Проповедник всем глагол ангельских был еси,
преблаженне отче, егда, по совершении с
преподобным Савватием воскреснаго ноцнаго
молитвословия изшед из храмины, внезапно
услышал еси глас жены плачущей и, узрев ю,
вопросил еси о причине плача. Она же рече:
«два юноши светли жестоко биша мя и рекоша
ми: бежите отсюда, ибо не для вас место сие, яко
зде иноков множество прославит Господа». Ты
же, слышав сие, умиленне Богу возгласил еси:
Аллилуиа.

Икос 6

Возсия свет велий от обители Соловецстей, осияваяй всю страну нашу, ибо лучами добродетелей твоих просвещаеши не токмо притекающих к цельбоносным мощем твоим, но и издалече верою призывающих тя. Озари убо светом Евангелия омраченная грехом сердца наша и укрепи нас во благочестии, да вси радостно взываем ти:

Радуйся, пустыни красное прозябение;

Радуйся, постников предивное украшение.

Радуйся, яко в бодреннем трезвении пребывал еси;

Радуйся, яко мзду трудов твоих на небеси восприял еси.

Радуйся, ангелов собеседниче;

Радуйся, Царствия Христова наследниче.

Радуйся, яко благодать от Бога обрел еси;

Радуйся, яко иерею благоговейному образ твой во сне списати повелел еси.

Радуйся, безмездный недугов целителю;

Радуйся, благодатный бесов прогонителю.

Радуйся, яко с преподобными Зосимою и Савватием ревностно трудился еси;

Радуйся, яко с ними наставник добр монахом явился еси.

Радуйся, отче наш Германе, преподобных Зосимы и Савватия сподвижниче.

Кондак 7

Хотя всем человеком спастися и в разум истины приити, Человеколюбец Господь указа ти место удобно спасения, идеже ты многими поты и скорбьми, злострадании и лишении неленостне Богу работал еси, выну вопия Ему: Аллилуиа.

Икос 7

Новаго Моисеа, древлему подобна, видим тя, богоизбранне отче наш, ибо в пустыни земнаго странствия нашего всех, к помощи твоей прибегающих, к Иерусалиму горнему наставляеши, фараона мысленнаго потопляя и всех молением твоим ограждая, вопиющих ти таковая:

Радуйся, молитвенниче наш неусыпный;

Радуйся, предстателю о нас непостыдный.

Радуйся, яко скорби пустынного жития
доблественне претерпел еси;

Радуйся, яко постом и молитвою, аки
крилами, на высоту добродетелей возшел еси.

Радуйся, чистотою душевною и телесною
Бога прославивый;

Радуйся, нравы твоими вся ны наставивый.

Радуйся, яко в небесных чертозах вселился
еси;

Радуйся, яко оных обителей и нам пред Богом
ходатай явился еси.

Радуйся, бед и напастей нас свободядай;

Радуйся, всем благая от Спаса Христа
подаваяй.

Радуйся, яко непрестанно духом горел еси;

Радуйся, яко со всеми человецы мир имел
еси.

Радуйся, отче наш Германе, преподобных
Зосимы и Савватия сподвижнице.

Кондак 8

Странно убо видети, како ты, богоблаженне
отче, старостию притружденный, за послушание

настоятелю и братии по морю многожды плавал еси, о нуждах новосозидаемья обители и об утешении братии попечение имея, отнюд покоя себе не дая и среди опасностей потопления живот твой Богови вверяя и сердцем взывая Ему: Аллилуиа.

Икос 8

Весь ум твой в небесная вперив, горняя мудрствовал еси, а не земная, преподобне отче наш, вышних ища, идеже есть Христос одесную Бога сядя, идеже празднующих глас непрестанный, идеже радость праведных несказанная. Тамо убо со всеми святыми водворяяся, слышиши от нас ублажения сии:

Радуйся, очесы веры на Христа присно взиравый;

Радуйся, в злостраданиих николиже роптавый.

Радуйся, яко на ладии многожды по морю плыл еси;

Радуйся, яко сие за послушание настоятелю и братии творил еси.

Радуйся, морских волнений и напасти не страшивыйся;

Радуйся, благому Промыслу Божию всецело покоривыйся.

Радуйся, яко смирением и послушанием Богу угодил еси;

Радуйся, яко козни вражия до конца сокрушил еси.

Радуйся, в бурю пловцем подавая спасение;

Радуйся, дивное им в бедах поможение.

Радуйся, яко душу твою по братии полагал еси;

Радуйся, яко имя Господне непрестанно призывал еси.

Радуйся, отче наш Германе, преподобных Зосимы и Савватия сподвижниче.

Кондак 9

Всякое плотское мудрование мужественне отринув, вдал еси себе в совершенное послушание настоятелю и братии, памятуя слово наставления святоотеческаго, яко послушание паче поста и молитвы есть, и тако достигл еси в мужа совершенна, в меру возраста Христова, Богу поя: Аллилуиа.

Икос 9

Витии премудрии не возмогут достойно восхвалити труды и подвижи твоя, ибо всего себе от юности в жертву Господеви возложив, даже до старости многолетняя распинал еси плоть со страстьми и похотьми, да очистиши сердце твое и да будеши храм Животворящаго Духа Святаго. Сподоби и нас, святче Божий, тебе усердно подражати и сице тебе возглашати:

Радуйся, в пустынных дебрех и горах привитавай;

Радуйся, постом и молитвою в напастех себе ограждавай.

Радуйся, яко чести и славы мирския избегал еси;

Радуйся, яко во смирение аки в порфиру Царствия Небеснаго облеклся еси.

Радуйся, благодати сосуде избранный;

Радуйся, любви, соуза совершенства, кладенец преизливанный.

Радуйся, яко игу Христову выю твою подклонил еси;

Радуйся, яко по трудех дневных ноци в молитве проводил еси.

Радуйся, вся обеты иноческия свято соблюдавый;

Радуйся, прельщениям лукаваго никакоже внимавый.

Радуйся, яко от всякаго зла себе хранил еси;

Радуйся, яко полчища бесов посрамил еси.

Радуйся, отче наш Германе, преподобных Зосимы и Савватия сподвижнице.

Кондак 10

Спасти хотя душу твою, нозе твои на камени веры поставил еси и, светильник слова Божия вжег, в законе Господни ходил еси, помышляя, яко странник и пришлец еси на земли и яко жительство Твое на небеси есть. Сего ради ко всем заповедем Господним направлялся еси, всяк путь неправды возненавидев, во еже непрестанно воспеваяй Христу Богу ангельскую песнь: Аллилуиа.

Икос 10

Стена еси и крепкое заступление обители твоя и всем верою молящимся тебе, ибо небесе

и земли Творец, видя богоугодное житие твое, облагодати тя, да будещи печальным утешение, скорбящим радование, недугующим врач и целитель, кающимся надежда прощения и всем во всяких нуждах помощник, да вси ублажают тя сице:

Радуйся, образе кротости и смирения;

Радуйся, теплый ходатаю нам спасения.

Радуйся, яко ревнующих о спасении под кровом своим соблюдаеши;

Радуйся, яко трудников и богомольцев обители твоя с небеси благословляеши.

Радуйся, обидимых благонадежное и скорое защищение;

Радуйся, в скорбех и печалех нам всем утешение.

Радуйся, яко всем, притекающим к тебе, в нуждах помогаеши;

Радуйся, яко за вся православныя христианы молитвы Богу возсылаеши.

Радуйся, на свещнице Христовой поставленный;

Радуйся, на земли дивно от Бога прославленный.

Радуйся, яко гнев Божий от нас грешных отвращаеши;

Радуйся, яко любовью чтущих святую память твою благодатно посещаеши.

Радуйся, отче наш Германе, преподобных Зосимы и Савватия сподвижнице.

Кондак 11

Пение надгробное со слезами смешанное принесл еси, всеблаженне отче, егда, возвратився в обитель, уведел еси о преставлении сподвижника твоего преподобнаго Савватия, егоже зело, яко брата, любил еси. Егда же Господь посла тебе новаго сподвижника твоего, преподобнаго Зосиму, тогда радости исполнился, благодарно Богу возгласил еси: Аллилуиа.

Икос 11

Светозарное светило показался еси, отче наш, Германе, в нощи греховней блуждающим, души наша светом богопознания просвещая и по пути заповедей Христовых ходити наставляя. Сего

ради к тебе усердно притекаем и тако тя
восхваляем:

Радуйся, целомудрия изрядный ревнителю;

Радуйся, чистоты усердный блюстителю.

Радуйся, яко надежду небеснаго наследия в
себе имел еси;

Радуйся, яко жития преподобных Зосимы и
Савватия списати повелел еси.

Радуйся, вся заветы преподобнаго Зосимы
свято хранивый;

Радуйся, ни един же от них преступивый.

Радуйся, яко о смертнем часе непрестанне
помышлял еси;

Радуйся, яко ко исходу от жития сего себе
присно уготовлял еси.

Радуйся, по Бозе упование твое на Матерь
Божюю возлагавый;

Радуйся, Богородицу яко Матерь Света выну
в песнех величавый.

Радуйся, яко преподобнаго Зосиму ко гробу
проводил еси;

Радуйся, яко тело его многотрудное слезами
теплыми оросил еси.

Радуйся, отче наш Германе, преподобных
Зосимы и Савватия сподвижнице.

Кондак 12

Благодать, свыше ти дарованную, подаждь
нам, досточудне отче наш, яко да и мы,
подражающе вере и благочестию твоему,
принесем Спасителю нашему дары духовныя;
покаяние теплое, молитвы усердныя,
братолюбие нелицемерное со всеми
добродетельми, и сподобимся купно с тобою
взывать Богу: Аллилуиа.

Икос 12

Поюще твоя чудесы, богоносне отче наш,
восхваляем подвиги твоя, ублажаем и кончину
твою, ибо, на смертном одре возлежа и исход
свой провидя, возжелал еси исповедатися и
Святых Христовых Таин причаститися. Сподоби
убо и нас христианския кончины живота нашего
и добраго ответа на Страшнем судищи
Христове, да зовем ти:

Радуйся, в монастыри преподобнаго Антония
Римлянина богоугодное житие твое скончавый;

Радуйся, в Новограде на послушании
умиленный дух твой Богу предавый.

Радуйся, яко и по смерти чудесы твоими сияеши;

Радуйся, яко духи нечистыя от человек прогоняеши.

Радуйся, от обители земныя во обители небесныя преселивыйся;

Радуйся, тамо со всеми святыми в вечней славе водворивыйся.

Радуйся, яко мощи твоя на месте трудов твоих почивают;

Радуйся, яко твоя мощи исцеления верующим источают.

Радуйся, духом воскресый прежде общаго воскресения;

Радуйся, и нашим душам указуяй путь обновления.

Радуйся, яко монахов множество наставника твоя почитают;

Радуйся, яко православних собор присно твоя убождает.

Радуйся, отче наш Германе, преподобных Зосимы и Савватия сподвижниче.

Кондак 13

О преподобне и преблаженне отче наш Германе. Приими ныне малое сие моление наше, от души в похвалу тебе приносимое, и твоим многомогущим предстательством умоли Господа нашего Иисуса Христа, да пробавит милость Свою нам грешным и подаст нам во временнем житии нашем вся благая и потребная яже к животу и благочестию, да и мы с тобою и всеми святыми выну Ему вопием: Аллилуиа.

Этот кондак читается трижды, затем икос 1-й и кондак 1-й

Молитва

О великий угодниче Христов, земный ангеле и небесный человеце, преблаженне отче наш Германе, преподобных Зосимы и Савватия сподвижниче, Соловецкий чудотворче и пустынножителю. Обстояще честную раку цельбоносных мощей твоих, мысленными очесы зрим тя с нами суща и мольбам нашим внемлюща. Сего ради с верою и любовью припадающе к тебе молим тя: призри с небесе святого на нас грешных, слабых духом и немощных телом, и умилосердися, помози нам твоим многомогущим ходатайством ко Творцу и

Спасителю нашему. Ты веси, яко подобно реце многоводней, разливаются по земли нашей безбожие, неверие, зловерие, ереси, расколы, распри, раздоры, разделения, и увы нам. Среди именующихся именем Христовым хулится имя Божие, раздирается Церковь — Тело Христово, попираются Евангелие и закон Христов. Ты зриши оскудение велие любве многих и умножение беззаконий, ихже ради грядет гнев Божий на нас грешных. К кому прибегнем, отче наш? К кому возопим? Кто предстанет и защитит нас? На тя упование наше возлагаем, предивный угодниче Христов. Испроси нам у Господа грехов наших прощение и отврати от нас весь гнев Его, праведно движимый на ны. Утверди веру правую в сердцах наших, защити Церковь святую, духом грядущаго в мир противника Христова обуреваемую. Даруй нам любовь к Богу и друг ко другу, мир и единомыслие, утоли вся раздоры и нестроения наша, да не до конца погибнем. Буди стена крепка и заступление обители твоей, в еяже созидании много потрудился еси. Буди отец и наставник и покровитель иноком, ихже с преподобными Зосимою и Савватием мудре собрал еси на месте трудов ваших. Помози им

подвигом добрым подвизатися, веру нераздельну соблюсти, главы невидимых змиев сокрушити, победителем греха явитися и житием своим прославити превелие имя Святыя Троицы. Не забуди и нас, любовию чтущих святую память твою и к тебе, яко отцу чадолюбивому, притекающих. Помогай и нам, отче наш милостивый, в душевных и телесных нуждах наших, подавай нам вся благая и потребная в жизни временней, да ревностно поработаем Господу Богу прочее время живота нашего, и понесем на себе иго Его благое и легкое Его бремя, и, тако достигше благодатию Христовою Небеснаго Царствия, сподобимся с тобою и со всеми святыми славити и воспевати пречестное и великолепое имя Отца и Сына и Святаго Духа ныне и присно и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**